



Mehanizam za međunarodne krivične sudove ("MMKS" ili "Mehanizam") osnovao je Savjet bezbjednosti Ujedinjenih nacija 22. decembra 2010. da nastavi nadležnosti, prava, obaveze i ključne funkcije Međunarodnog krivičnog suda za Ruandu ("MKSJR") i Međunarodnog krivičnog suda za bivšu Jugoslaviju ("MKSJ") nakon okončanja njihovih mandata.

## PODACI O PREDMETU

Trenutno je u bjekstvu osam osoba protiv kojih je MKSR podigao optužnice za učesće u genocidu u Ruandi 1994. godine. Mehanizam ima nadležnost nad sljedećom trojicom optuženih: Augustinom Bizimanom, Félicienom Kabugom i Protaisom Mpiranyom. Vlastima u Ruandi proslijeđeni su predmeti protiv preostalih pet bjegunaca: Fulgencea Kayisheme, Charlesa Sikubwaboa, Aloya Ndimbatija, Ryandikayoa i Phénéasa Munyarugame. Još jedan bjegunac čiji je predmet proslijeđen u Ruandu, Ladislav Ntaganzwa, uhapšen je u Kongu 9. decembra 2015.

**MICT-12-02**

## **BJEGUNAC - PROTAIS MPIRANYA**



Protais Mpiranya je bio komandant bataljona predsjedničke garde Oružanih snaga Ruande (FAR-a) od januara do jula 1994.

**Godina i mjesto rođenja**

1960, okrug Giciye, prefektura Gisenyi, Ruanda

**Optužnica**

Važeća optužnica podignuta 4. juna 2013.

**Status predmeta**

U bjekstvu od 28. januara 2000.

## ISTORIJAT POSTUPKA

### OPTUŽNICA

Optužnicom se Protais Mpiranya tereti za genocid ili, alternativno, za saučesništvo u genocidu, kao i za zločine protiv čovječnosti i ubistvo kao kršenje zajedničkog člana 3 Ženevskih konvencija i Dodatnog protokola II Ženevskih konvencija, počinjene u Ruandi od 6. aprila do 17. jula 1994. godine. Tokom tog perioda, Mpiranya je bio komandant bataljona predsjedničke garde Oružanih snaga Ruande.

U optužnici se navodi da je Mpiranya odgovoran za naređivanje ubistva i/ili nanošenje teških tjelesnih povreda osobama identifikovanim kao pripadnici plemena Tutsi, uključujući ubistvo predsjednika prelazne vlade Agathe Uwilingiyimana, predsjednika Ustavnog suda Josepha Kavarugande, ministra poljoprivrede Frederiquea Nzamurambahoa, ministra informisanja Faustina Rucogozae i potpredsjednika Socijaldemokratske stranke (*Parti-Sociale Démocrate*) i potencijalnog kandidata za predsjednika prelazne skupštine u skladu sa Sporazumom iz Arushe Feliciena Ngangoa. U optužnici se dalje navodi da je Mpiranya odgovoran za ubijanje deset belgijskih pripadnika mirovnih snaga UN-a u kampu Kigali od strane Oružanih snaga Ruande.

U optužnici se navodi da su tokom tog perioda širom Ruande vršeni rasprostranjeni i/ili sistematski napadi na civilno stanovništvo na osnovu etničke pripadnosti plemenu Tutsi ili na političkoj osnovi. Tokom tih napada, neki stanovnici Ruande su lišili života ili nanijeli povrede osobama koje su smatrane Tutsima, političkim protivnicima i osobama povezanim s njima, i pripadnicima mirovnih snaga.



Optužnica sadrži sljedeće optužbe:

**Jedna tačka za genocid (tačka 1)**

**Jedna tačka za saučesništvo u genocidu (tačka 2)**

**Pet tačaka za zločine protiv čovječnosti**

- Ubistvo (tačka 3)
- Istrebljivanje (tačka 4)
- Silovanje (tačka 5)
- Progon (tačka 6)
- Druga nehumana djela (tačka 7)

**Jedna tačka za kršenje zajedničkog člana 3 i Dodatnog protokola II**

- Ubistvo (tačka 8)

## PRENOS PREDMETA NA MMKS

Dana 1. augusta 2012., predmetni spis protiv Protaisa Mpiranyae predat je Tužilaštvu MMKS-a.

Dana 29. aprila 2013., sudija Vagn Joensen, sudija-pojedinac MMKS-a, izdao je nalog za hapšenje i nalog za prebacivanje kojima se od svih država članica UN-a traži da lociraju, uhapsu i prebace Mpiranyu u nadležnost ogranka MMKS-a u Arushi gdje će Mpiranya biti pritvoren u Pritvorskoj jedinici UN-a.

U skladu s Rezolucijom Savjeta bezbjednosti 1966 (2010), sve države imaju obavezu da sarađuju s MMKS-om na lociranju, hapšenju, pritvaranju, predaji i prebacivanju optuženih koji su još u bjekstvu.